

Empat universiti bantu pulih Sungai Kim Kim

Usaha jadikan kawasan pusat rekreasi masyarakat

22 Sep 2020 [+8 more](#) Oleh Nurul Amanina Suhaini bhnews@bh.com.my

Johor Bahru: Empat universiti akan bekerjasama untuk menjayakan proses rehabilitasi Sungai Kim Kim di Pasir Gudang melalui beberapa inisiatif yang dijangka dilaksanakan pada November depan.

Pengerusi Jawatankuasa Kesihatan dan **Alam Sekitar** Johor, R Vidyananthan, berkata universiti terbabit ialah Universiti Teknologi Malaysia (UTM), Universiti Tun Hussein Onn Malaysia (UTHM), Universiti Sains Islam Malaysia (USIM) dan Universiti Teknikal Malaysia **Melaka** (UTEM).

Beliau berkata, usaha itu sejajar dengan penekanan kerajaan **negeri** bawah pimpinan Menteri Besar, Datuk Hasni Mohammad, yang memandang serius **isu** berkenaan.

“Setiap universiti terbabit ada memberi input mengenai Sungai Kim Kim. Kita bukan saja mahu ia bersih tanpa pencemaran tetapi juga mengubah kawasan itu menjadi pusat rekreasi untuk kegunaan masyarakat.

“Ia akan membabitkan landskap yang mesra masyarakat dan tidak nampak seperti kawasan perindustrian,” katanya pada sidang media selepas program Syarahan Perdana Profesor di Dewan Sultan Iskandar UTM, di sini, semalam.

Menjelaskan lanjut, Vidyananthan berkata, hasil kajian mahupun input daripada universiti sudahpun dibawa kepada perhatian Menteri Besar Johor, selain penganjuran

beberapa siri taklimat.

Kita bukan saja mahu ia bersih tanpa pencemaran tetapi juga mengubah kawasan itu menjadi pusat rekreasi untuk kegunaan masyarakat.

Beliau berkata, usaha itu turut membabitkan kerjasama Jabatan **Alam Sekitar** (JAS), Jabatan Pengairan dan Saliran Malaysia (JPS) serta Unit Perancang Ekonomi **Negeri** (UPEN).

“Bagi mengelakkan insiden pencemaran Sungai Kim Kim daripada berulang, kerajaan **negeri** dengan kerjasama JAS akan membuat pemeriksaan dan pemantauan secara berkala terhadap kawasan perindustrian di

sekitar sungai itu,” katanya.

Vidyananthan berkata, peruntukan bagi usaha memulihkan Sungai Kim Kim itu diharap akan dimasukkan ke dalam Belanjawan **Negeri** 2021.

R Vidyananthan, Pengerusi Jawatankuasa Kesihatan dan **Alam Sekitar** Johor